

## 1900-ական թվականներ

Ֆ. ՇԻԼԼԵՐ

### ԼՈՂՎՈՐ

Ո՞վ ձեզնից՝ ասպետ կամ թե զինակիր  
Կընկնի այստեղից անտակ ծովի մեջ,  
Զգում եմ ահա գավաթն իմ ոսկի,  
Այս գավաթն, ով որ անդունդի անվերջ  
5 Խավարում գտնի ու անփորձ հանի,  
Նրան հաղթության պարգև թող լինի:

Կանչեց թագավորն ու բարձր ժայռից,  
Որ հակված է սև անդունդի վերա,  
էն բարձր ժայռի < . . . > ծայրից  
10 Շըպըրտեց ներքև գավաթն իր ոսկյա.  
— Ո՞վ է այն խիզախ, համարձակ հոգին,  
Որ իմ գավաթը ետ բերի կըրկին:

Կանգնած են անշարժ զինակիր, ասպետ,  
Լուռ են արքայի կոչին [խելագար],  
15 Նայում են ահով ահռելի ծովին,  
Զրկա խիզախող գավաթի համար,  
Ու երրորդ անգամ կանչում է արքան —  
Մի՞թե ոչ մինը սիրտ չունի այնքան:

Լուռ են ամենքը: Եվ հանկարծ մի քաջ  
20 Համարձակ ահեղ գալիս է առաջ...  
Քանդում է իրան թիկնոցն ու գոտին  
Անմոռնչ, հանդարտ դընում է գետին...  
Տիկնայք, ասպետներ սարսափում են լուռ.  
— Ա՛հ, ո՞վ ես, ջահել, ո՞ր ես գնում, ո՞ր...

25 Մոտենում է նա ժայռին սեպացած,  
Ներքև սևեռում հայացքն անվեհեր:  
Անդունդքի ծոցից հորձանքը պրծած  
Խուլ որոտալուվ լեռնանում է վեր,  
Կուտակում ալիք, ու փրփուրն եռում,  
30 Ասես թե մըթնած երկինքն է գոռում:

Ոռնում է, շաշում, ծեծում, շառաշում  
Հուրն ու ջուրն ասես մրցում են այնտեղ,  
Սյունաձև շոգին երկինքն է թըռչում,  
Ալիքն ալիքին ճնշում է անվերջ,  
35 Ոչինչ չի հատնում, ոչինչ չի անցնում,  
Ծովը իրենից նոր ծով է ծնում:

Ետ քաշվեց հանկարծ տարերքը հուզված.  
Ճերմակ փրփուրը միջից պատռելով,  
Մինչև դժոխքի հատակը [ասես]  
40 Բաց արավ ծովը կոկորդը սև սև,  
Եվ պըտըտվելով ջրերը թընդում  
Ու կուլ են գընում էն սև անդընդում...